

# Communiqué de presse

## Den Hesper Jugendgemengerot huet sech eng éischte Kéier mam Schäfferot getraff

Samsdes den 11. Mee huet de Jugendgemengerot sech eng éischte Kéier mam ganze Schäfferot vun Hesper getraff. De Buergermeeschter Marc Lies huet an der Begréissung erkläert dass hie frou ass, dass no zwee Jugendforen an enger Rei Projeten elo mam Jugendgemengerot eng Méiglechkeet fir all Jonker aus der Hesper Gemeng besteet fir regelméisseg iwwert hir Besoinen, hir Uleies an hir Iddien mateneen ënner Jonker ze diskutéieren a Projeten auszeschaffen. Dem Schäfferot ass et wichteg d'Meenungen vun de Jonken ze considéieren a vun hinnen gewuer ze ginn wéi si hir Gemeng an Zukunft gesinn.

Déi am Jugendgemengerot engagéiert 10 Jonk schaffen zënter Januar an hirer Gemeng aktiv mat an iwwerhuele Verantwortung fir aner Jonker an doriwwer eraus och fir all d'Bierger vun Hesper andeems si Initiativen ergräifen a Virschléi maache wéi d'Gemeng sech kann entwéckelen.

De Präsident Yves Weiland huet dem Schäfferot an dëser éischter Entrevue de Jonken hir Iddi vun engem Maart zu Hesper virgestallt: „Ee Maart, ähnlech wéi déi an aner Gemengen, wier eng flott zousätzlech Offer fir d'Bierger vun Hesper a giff och Leit aus aner Gemengen unzéien“. Zousätzlech soll ee Floumaart organiséiert ginn, wat de Buergermeeschter Marc Lies eng ganz flott Iddi fonnt huet. De Jugendgemengerot wäert elo de Geschäftsverband an de Maartverband kontaktéieren fir dës Iddi weider auszeschaffen.

De Vize-Präsident Claude Charpentier huet d'Iddi vun enger Grillplaz virgestallt. Als Jugendpompjee kennt hie sech aus wat d'Sécherheet ugeet: „Den Ënnergrond soll aus Beton sinn well am Sand ee Sickerbrand kéint entstoen“. Déi Jonk wëllen domadder eng Plaz schafen wou si sech kënnen treffen. Well de Risiko awer besteet dass och aner Leit se benotzen déi hiren Dreck net ëmmer ewechraumen, soll sech iwwerluecht ginn wéi een dëst an de Grëff ka kréien.

Niewent dësen zwee grouse Projeten hunn déi Jonk och Froen un de Schäfferot gestallt op déi de Schäfferot geäntwert huet, ënner anerem dass de Jugendgemengerot e Budget zur Verfügung gestallt kritt deen en autonom ka verwalten, no den übleche Regeln vun der Gestoun vu Suen.

De Jugendgemengerot ass no engem éischte Jugendforum 2002 an engem weideren 2010 eng Initiativ vun der Jugendkommissioun, dem Jugendtreff an dem Hesper Schäfferot fir ee méi stännegen Austausch mat den Jonken ze kréien a si méi staark ze bedeelegen. Wéi och schonn bei de Jugendforen gëtt d'Gemeng Hesper do vun der ASBL 4motion begleet, déi duerch hir konzeptuell Aarbecht, Moderatioun a Formatioun Initiativen am Beräich vun der Partizipatioun zënter iwwer 10 Joer begleeten.

**Wie ka matmaachen?**

- All Jonken aus der Gemeng zwëscht 14 a 24 Joer ka Member ginn andeems hien/hatt d'Ënnerstëtzung vu 4 anere Jonken kritt (duerch eng Ënnerschrëftlëscht).
- Doriwwereraus kann all Jonken, och ouni Member ze sinn, op d'Versammlunge kommen a matschwätzen, ouni awer Stëmmrecht ze hunn.

**Wéi funktionéiert de Jugendgemengerot?**

- 2 mol pro Mount treffe sech all d'Jugendgemengeréit an diskutéieren iwwer verschidden Themen, Projeten a ginn hiren Avis och of zu Froe vum Schäfferot.
- An der éischter Versammlung gëtt de Komitee vum Jugendgemengerot gewielt.
- De Komitee besteet aus enger/engem PräsidentIn, Vize-PräsidentIn, SekretärIn, 2 Memberen an de PräsidentInnen vun den Aarbechtsgruppen. De Komitee invitéiert d'Jugendgemengeréit op d'grouss Sëtzungen, këmmert sech ëm de Rapport an d'Präsenzen, setzt d'Decisiounen ëm, gëtt se un de Buergermeeschter & seng Equipe weider a vertritt de Jugendgemengerot an der Öffentlechkeet (Presse, Versammlungen).

**Wéi eng Ënnerstëtzung kréien déi Jonk / de Jugendgemengerot?**

- De Jugendgemengerot ass net eleng mee gëtt ënnerstëtzt vun der Gemeng, der Jugendkommissioun, dem Jugendtreff an der asbl 4motion. Fir praktesch, organisatoresch a finanziell Froen kréien déi Jonk Hëllef: Fir Invitatiounen ze verschécken, d'Versammlungen ofzehalen (Räim, ...), d'Moderatioun vun de Versammlungen, d'Homepage, Projetfinanzéierung, ...

-----

**Fir weider Informatiounen:**

Rapport vun der Entrevue & Konzept vum Jugendgemengerot an der Annexe.

Romain Juncker, Jugendtreff Hesper: [romain.juncker@jugendtreffhesper.lu](mailto:romain.juncker@jugendtreffhesper.lu)

Gary Diderich, 4motion asbl: [gary@4motion.lu](mailto:gary@4motion.lu)